

3 SAN JUAN

Yi Necy Huidibi San Juan Yajniguejx Gayo

¹Señor Gayo:

Nguejxypich capxpocxin ma miich. Hich miich nyajniguejxyp jada necy. Nnigohuajc'ajtypich ma je mibijcpidijc. Ooy ndzocy njihuüyich miich.

²Miich migüg, ooy nmigüg'adyii. Dios nmibijctzooybich miid miich ycixpi, huen agujc jotcuje mdzinähuipy etz mmic'idipy m'oy'idipy. Nejhuüyich co oy m'ity ma Dios. ³Com oy ti njotcugüyich co je mibijcpidijc ajcxy ymiin ya huidibi jim tzoon ma miich ajcxy, e yi' ajcxy xytij'ajtmooyich jadu'n nej tiydudägy mdzinäy e nañ jadu'n nej yajxon mguyduni Dios ytiy'ajt. ⁴Ooy njotcujcidyich jac nigi co tiy'ajt nbaadyich jadu'n nej nmigügtijcich cuydungixy Dios ytiy'ajt.

⁵Miich migüg huidibi ooy ndzocy njihuüyich, ooy njäygidägyich co oyjäy'ajtin mduñ miid je migügtijc. Nigi oy co oyjäy'ajtin mduñ miid je migügtijc huidibi ca' m'ixy'adyii. ⁶Yi mibijcpidijc, huidibi ti choon ma miich ajcxy, ti tiy'ajt yejccixy ma je mibijcpidijc ya jadu'n nej miich oyjäy'ajtin mdzachtuñ. Ooy oy mduñ co mmöy yi migügtijc yi

ytü'amgixpi e mguejxnaxy yajxon jadu'n nej Dios jäygidägy. ⁷Yi jadu'mbi jäy huidibi mguejxnajxyp anajty hue' Dios y'ayuc ycixpi yhuidity, e ca' yi' ajcxy ti pijctzoy ma je jäy ajcxy huidibi ca' Dios ytiy'ajt nejhuüiyi. ⁸Copicy nbubejtim ajcxy je mibijcpidijc ajcxy huidibi Dios y'ayuc ycixpi yhuiditycixy. Co jadu'n nbubejtim, chi jadu'n paady nej jihuüy tú'ciy nduunim miid yi' ajcxy ma Dios y'ayuc capxhuäcxii.

Je Diótfrefes yjibic-huinma'n

⁹Ti nnijayüyich jayhuin je mibijcpidijc huidibi nayyöymújcgixp jim. Jim yajpaady tüg jäy huidi xii Diótfrefes huidibi ca' cöbiga'nich n'ayucich etz ngötújcinich. Amij agix jada jäy chachñayjihuüyii, yi' ci'm tzach'ane'mam ma miich ajcxy. ¹⁰Paady ycixp co nnícxibich jim ma miich ajcxy nyajnimähuamy ajcxy tüg'óciy yi jibic-huinma'n huidibi Diótfrefes ytumy, jadu'n nej jibic xyñigapxy xyñi'ojüyich etz jadu'n nej anii yaj'ixpicy. E nañ ni yi' ca' mmiidity jotcuje'ajtin jadu'n nej

chach'idich. Nīgi ytundigoy co ca' yajjättäga'n ajt nmigügtijc huidibi Dios miid ycixpi yhudity. E co iich ajt nmigüg pinjaty yajjättäga'n, chi yi' capx'aducy e yajpidzimy je mibijcp huidibi jäy yajjättäc, e ca' je' cöbiga'n ma miich mnayyöymujctac.

¹¹Miich hermano, huidibi ooy ndzocy njihuïyich, ca' mguydunipy jada jibic-huinma'n. Cuydun janchtiy yi oybi huinma'n. Yi jäy ajcxy huidibi oybi tungixp, yi' ajcxy ymiid Dios ytiy'ajt ma yjot yhuinma'n. Yi jäy ajcxy huidibi jibic tungixp, ca' yi' ajcxy Dios ytiy'ajt nejhuiyi.

Je Demetrio tüg y'ijxpejt oybi

¹²Yi jäy, huidibi yxii Demetrio, tüg'óciy jäy ajcxy ymīnaangixy co ooy y'oyjäyity, e janch yajpaady

ma Dios ytiy'ajt. Hich nañ jadu'n nmīna'nich co ooy y'oyjäyity yi Demetrio, e miich mnejhuiyb co iich ajt ndiy'ajt janch janch yi'.

Capxycíjxin

¹³Ooy iich anajty miich mijcajee ayuc njayajmiidmiydäga'n. Per ca' nijayihua'n necy'am.

¹⁴Hue' janchtiy njijp'ixyich co nnicxa'nich tzojc ma miich ajcxy, e nmīidmiydäga'nich miich ajcxy ci'm.

¹⁵Jotcujc'ájtci. Yi mibijcpidijc ajcxy huidibi ya yajpatp yajnajxpy ajcxy capxpocxin ma miich ajcxy. Tun may'ajt yajnájxigich ngapxpocxin ma nmigügtijcich jīm nidüg nidüg etz xiibety xiibety. Cham ngapxycíxyich, Juan je Apóstol.